

四庫全書

集部

欽定四庫全書

古樂苑卷三十六

明 梅鼎祚 編

襍曲歌辭 宋

自君之出矣

漢徐幹室思詩自君之出矣明鏡暗不治思君如流水無有窮已時

自君之出矣蓋起於此一作擬室思詩齊虞羲亦謂之思君去時行

宋孝武帝

一作許瑤

自君之出矣金翠闇無精思君如日月回還晝夜生

同前

江夏王義恭

自君之出矣  
筇錦廢不開  
思君如清風  
曉夜常徘徊

同前

顏師伯

自君之出矣  
芳帷低不舉  
思君如回雪  
流亂無端緒

同前

本題云題詩後寄  
行人姑從郭本

鮑令暉

自君之出矣  
臨軒不解顏  
砧杵夜不發  
高門晝恒闔  
帷中流熠燿  
庭前華紫蘭  
物枯識節異  
鴻歸知客寒  
遊取暮春盡  
餘思獨君還

一作遊用暮冬盡除春待  
君還惟一作帳歸一作來

同前

二首集云  
奉和代徐

齊王融

自君之出矣芳蕤絕瑤卮思君如形影寢興未曾離

自君之出矣金爐香不然思君如明燭中宵空自煎

同前

虞羲

自君之出矣楊柳正依依君去無消息唯見黃鶴飛關  
山多險阻士馬少光輝流年無止極君去何時歸

同前

梁范雲

自君之出矣羅帳咽秋風思君如蔓草連延不可窮

同前 六首

陳後主

自君之出矣霜暉當夜明  
思君若風影來去不曾停  
自君之出矣房空帷帳輕  
思君如晝燭懷心不見明  
自君之出矣不分道無情  
思君若寒草零落故心生  
自君之出矣塵網暗羅帷  
思君如落日無有暫還時  
自君之出矣綠草遍階生  
思君如夜燭垂淚著雞鳴  
自君之出矣愁顏難復覩  
思君如藥條夜夜只交苦

同前

賈馮吉

自君之出矣紅顏轉憔悴思君如明燭煎心且銜淚

同前

隋陳叔達

自君之出矣明鏡罷紅妝思君如夜燭煎淚幾千行

秋歌

藝文無題  
在秋部

宋南平王鐔

昊天清且高秋氣發初涼白露下微津明月流素光凝  
煙汎城闕淒風入軒房朱華先零落綠草就芸黃纖羅  
還笥篋輕紈改衣裳

遊子移

宋江夏王義恭

三河遊蕩子麗顏邁荆寶携持玉柱箏懷挾忘憂草綢繆甘泉中馳逐邯鄲道春服候時製秋紈迎涼造珍魄暉素腕玉迹滿襟抱常歎樂日晏恒悲歡不早揮吹傳舊美趨謠盡新好仲尼為輟餐秦王足傾倒

懷園引

宋謝莊

鴻飛從萬里飛飛河岱起辛勤越霜霧聯翩遡江汜去舊國違舊鄉舊海悠且長迴首瞻東路延嗣向秋方登楚都入楚關楚地蕭瑟楚山寒歲去冰未已春來鴈不

還風肅幌兮露濡庭漢水初綠柳葉青朱光霽霽雲英  
英離禽喈喈又晨鳴菊有秀兮松有蕤憂來年去容髮  
衰流陰逝景不可追臨堂危坐悵欲悲試託意兮向芳  
蓀心綿綿兮屬荒樊想綠蘋兮既冒沼念幽蘭兮已盈  
園夭桃晨暮發春鶯旦夕喧青苔蕪石路宿草塵蓬門  
山夜憂

宋謝莊

庭光盡山明歸流風乘軒卷明月緣河飛澗鳥鳴兮夜  
蟬清橘露靡兮蕙煙輕凌別浦兮值泉躍經喬木兮遇



援驚南臯別鶴行竹漢東鄰孤管入青天沈疴白髮共  
急日朝露過隙詎餘年年既去兮髮不還金膏玉液豈  
留顏迴舫柁繩戶收棹掩荆關

會吟行

樂府解題曰會吟行其  
致與吳趨同會曰會稽

宋謝靈運

六引緩清唱三調佇繁音列筵皆靜寂咸共聆會吟會  
吟自有初請從文命敷敷績壺冀始刊木至江汜列宿  
炳天文負海橫地理連峰競千仞背流各百里漉池漉  
粳稻輕雲暖松杞兩京愧佳麗三都豈能似層臺指中

天高墉積崇雉飛燕躍廣途鷗首戲清沚肆呈窈窕容  
路曜嫵媚子自來彌世代賢達不可紀句踐善廢興越  
叟識行止范蠡出江湖梅福入城市東方就旅逸梁鴻  
去桑梓牽綴書土風辭殫意未已

容五臣作客  
世一作年

松柏篇

并序

余患脚上氣四十餘日知舊先借傅玄集以  
余病劇遂見還開哀適見樂府詩龜鶴篇於  
危病中見長逝詞惻然酸懷抱如此重病彌  
時不差呼吸之喘舉目悲矣火藥間缺而擬  
之

宋鮑照

松柏受命獨歷代長不衰人生浮且脆孰若晨風悲東  
海迸逝川西山蕞落暉南郭悅籍短蒿里收永歸諒無  
疇昔時百病起盡期志士惜牛刀忍勉自療治傾家行  
藥事顛沛去迎醫徒備火石苦奄至不得辭龜齡安可  
獲岱宗限已迫睿聖不得留為善何所益捨此赤縣居  
就彼黃墟宅永離九原親長與三辰隔屬纊生望盡闔  
棺世業埋事痛存人心恨結亡者懷祖葬既云及壙隧  
亦已開室族內外哭親疏同共哀外姻遠近至名列通

夜臺扶輿出殯宮低迴廳庭室天地有盡期我去無還  
日居者今已盡人事從此畢火歇煙既沒形銷聲亦滅  
鬼神來依我生人永辭訣大暮杳悠悠長夜無時節鬱  
湮重冥下煩冤難具說安寢委沈冥戀戀念平生事業  
有餘結刊述未及成資儲無擔石兒女皆孩嬰一朝放  
捨去萬恨纏我情追憶世上事束教以自拘明發靡怡  
念夕歸多憂虞撤閒晨逕流輟宴式酒濡知今曠日苦  
恨失爾時娛遙遙遠民居獨埋深壤中墓前人跡滅冢

上草日豐空林響鳴蜩高松結悲風長寐無覺期誰知  
逝者窮生存處交廣連榻舒華裯已沒一何苦楮哉不  
容身昔日平居時晨夕對六親今日掩奈何一見無諧  
因禮席有降殺三齡速過隙几筵就收撤室宇改疇昔  
行女遊歸途仕子復王役家世本平常獨有亡者劇時  
祀望歸來四節靜瑩丘孝子撫墳號父子知來不欲還  
心依戀欲見絕無由煩冤荒隴側肝心盡崩抽

郭一作  
郊限一

作恨夕歸  
一作父歸

鳴鴈行

衛鮑有苦葉詩曰雖雖鳴鴈  
旭日始旦鳴鴈行蓋出於此

宋鮑照

雖雖鳴鴈鳴始旦齊行命侶入雲漢中夜相失羣離亂  
留連徘徊不忍散憔悴容儀君不知辛苦霜雪亦何為

霜雪一作風霜

同前

隋李孝貞

聽琴旋蔡子張羅避翟公夕宿寒林上朝飛空井中既  
竝玄雲曲復變海魚風一報黃苑惠還遊萬歲宮

詩紀云此

詩本詠雀樂府題曰  
鳴雁行或有誤也

北風行

北風本衛詩也北風詩曰北風其涼雨雪其零傳云北風寒涼病害萬物以喻

君政暴虐百姓不親也鮑照傷北風雨雪而行人不歸與衛詩異矣集作北風涼行

宋鮑照

北風涼雨雪零京洛女兒多妍粧遙豔帷中自悲傷沈  
吟不語若為忘問君何行何當歸苦使妾坐自傷悲慮

年至慮顏衰情易復恨難追

沈吟不語若為忘一作沈吟不語若有忘慮年至一

作慮  
年來

春日行

宋鮑照

獻歲發吾將行春山茂春日明園中鳥多嘉聲梅始發  
柳始青汎舟艫齊棹驚奏採菱歌鹿鳴風微起波微生  
弦亦發酒亦傾入蓮池折桂枝芳袖動芬葉披兩相思  
兩不知梅始發柳始青一作梅始發桃始榮風微起波微生一作微波起微風生入蓮池折桂枝一作  
入蓮花  
援桂枝

代少年時至衰老行

此下五首樂府諸家不載按鮑照集題上並有代字

則此必舊有是作而照擬之也大抵為嗟老傷窮羈旅無聊之意而已



宋鮑照

憶昔少年時馳逐好名晨結友多貴門出入富兒鄰綺  
羅豔華風車馬自揚塵歌唱青琴女彈箏燕趙人好酒  
多芳氣餽味厭時新今日每相念此事邈無因寄語後  
生子作樂當及春

代陽春登荆山行

宋鮑照

旦登荆山頭崎嶇道難遊早行犯霜露苔滑不可留極  
眺入雲表窮目盡帝州方都列萬室層城帶高樓奕奕

朱軒馳紛紛縞衣流日氛映山浦暄霧逐風收花木亂  
平原桑柘盈平疇攀條弄紫莖藉露折芳柔遇物雖成  
趣念者不解憂且共傾春酒長歌登山丘

桑柘盈平疇  
一作桑柘繇

平時

代貧賤愁苦行

宋鮑照

湮沒雖死悲貧苦即生劇長歎至天曉愁苦窮日夕盛  
顏當少歇鬢髮先老白親友四面絕朋知斷三益空庭  
慙樹萱樂餌愧過客貧年忘日時黥顏就人惜俄頃不

相酬惡怩面已赤或以一金恨便成百年隙心為千條  
計事未見一獲運圯津塗塞遂轉死溝洫以此窮百年  
不如還窶窳

代邊居行

宋鮑照

少年遠荆陽遙遙萬里方陋巷絕人徑茅屋摧山岡不  
覩車馬迹但見麋鹿場長松何落落丘隴無復行邊地  
無高木蕭蕭多白楊盛年日月盡一去萬恨長悠悠世  
中人爭此錐刀忙不憶貧賤時富貴輒相忘紛紛徒滿

目何闌慨予傷不如一畝中高會挹清漿遇樂便作樂

莫使候朝光

荆一作京  
方一作行

代邽街行

宋鮑照

佇立出門衢遙望轉蓬飛蓬去舊根在連翩逝不歸念  
我捨鄉俗親好父乖違慷慨懷長想惆悵戀音徽人生  
隨事變遷化焉可祈百年難必果千慮易盈虧

中興歌

十首

宋鮑照

千冬遲一春萬夜視朝日生平值中興歡起百憂畢

遲一

作  
逢

中興太平運化清四海樂祥景照玉臺紫煙遊鳳閣  
碧樓含夜月紫殿爭朝光綵池散蘭麝風起自生芳  
白日照前牕玲瓏綺羅中美人掩輕扇含思歌春風  
三五容色滿四五妙華歇已輸春日歡分隨秋光沒  
北出湖邊戲前還苑中遊飛轂繞長松馳管逐波流  
九月秋水清三月春花滋千金逐良日皆兢中興時  
窮泰已有分壽夭復屬天既見中興樂莫持憂自煎

襄陽是小地壽陽非帝城今日中興樂遙冶在上京  
梅花一時豔竹葉千年色願君松柏心採照無窮極

行路難

十八首樂府解題曰行路難備言世路艱難及離別悲傷之意多以君不見爲

首按陳武別傳云武常牧羊諸家牧豎有知歌謠者武遂學行路難則所起亦遠矣

宋鮑照

奉君金巵之美酒璚瑁玉匣之彫琴七綵芙蓉之羽帳  
九華蒲萄之錦衾紅顏零落歲將暮寒光宛轉時欲沈  
願君裁悲且減思聽我抵節行路吟不見柏梁銅雀上

寧聞古時清吹音

厄一作區  
璫一作玳

洛陽名工鑄為金博山千斷復萬鏤上刻秦女攜手仙  
承君清夜之歡娛列置幃裏明燭前外發龍鱗之丹綵  
內含麝芬之紫煙如今君心一朝異對此長歎終百年

歡娛一  
作娛樂

璫闔玉墀上椒閣文牕繡戶垂綺幕中有一人字金蘭  
被服纖羅蘊芳藿春燕差池風散梅開帷對影弄春爵  
含歌攬涕不能言人生幾時得為樂寧作野中之雙鳬

不願雲間之別鶴

蘊一作采春一作禽  
不能言一作恒抱愁

瀉水置平地各自東西南北流人生亦有命安能行歎  
復坐愁酌酒以自寬舉杯斷絕歌路難心非木石豈無  
感吞聲躑躅不敢言

君不見河邊草冬時枯死春滿道君不見城上日非暝  
沒山去明朝復更出今我何時當得然一去永滅入黃  
泉人生苦多懽樂少意氣敷腴在盛年且願得志數相  
就牀頭恒有酤酒錢功名竹帛非我事存亡貴賤委皇



天非暝一作今暝山  
一作盡委一作付

對案不能食拔劒擊柱長歎息  
丈夫生世能幾時安能  
蹀躞垂羽翼棄檄罷官去還家  
自休息朝出與親辭暮  
還在親側弄兒牀前戲看婦機  
中織自古聖賢盡貧賤

何況我輩孤且直能一作會  
檄一作置

愁思忽而至跨馬出北門舉頭  
四顧望但見松柏園荆  
棘鬱蹲蹲中有一鳥名杜鵑言  
是古時蜀帝魂聲音哀  
苦鳴不息羽毛憔悴似人髡飛  
走樹間啄蟲蟻豈憶往

日天子尊念此死生變化非常理中心惻愴不能言

踣踣

集作搏搏  
啄一作逐

中庭五株桃一株先作花陽春沃若二三月從風簸蕩  
落西家西家思婦見悲惋零淚沾衣撫心歎初我送君  
出戶時何言淹留節迴換牀席生塵明鏡垢纖腰瘦削  
髮蓬亂人生不得恒稱意惆悵徙倚至夜半

沃若二三  
月一作妖

治二月中見  
悲一作見之

劉藥染黃絲黃絲歷亂不可治我昔與君始相值爾時

自謂可君意結帶與我言死生好惡不相置今日見我  
顏色衰意中索寞與先異還君金釵瑋簪不忍見之

益愁思

結帶與我言死生好惡不相置一作結帶與君  
同死生好惡不擬相棄置索寞一作錯亂金一

作玉見之

一作見此

君不見薜華不終朝須臾淹冉零落銷盛年妖豔浮華  
輩不久亦當詣冢頭一去無還期千秋萬歲無音詞孤  
魂煢煢空隴間獨魄徘徊遶墳基但聞風聲野鳥吟豈  
憶平生盛年時為此令人多悲悵君當縱意自熙怡

君不見枯籜走階庭何時復青著故莖君不見亡靈蒙  
享祀何時傾盃竭壺罌君當見此起憂思寧及得與時  
人爭生人倏忽如絕電華年盛德幾時見但令縱意存  
高尚旨酒佳肴相胥讌持此從朝竟夕暮差得忘憂消  
愁怖胡為惆悵不得已難盡此曲令君忤

得一  
作能

今年陽初花滿林明年冬末雪盈岑推移代謝紛交轉  
我君邊戍獨稽沈執袂分別已三載邇來淹寂無分音  
朝悲慘慘遂成滴暮思遶遶最傷心膏沐芳餘久不御

蓬首亂鬢不設簪徒飛輕埃舞空帷粉黛器靡復遺  
自生留世苦不幸心中惕惕恒懷悲

春禽啾啾旦暮鳴最傷君子憂思情我初辭家從軍僑  
榮志溢氣干雲霄流浪漸冉經三齡忽有白髮素髭生  
今暮臨水拔已盡明日對鏡復已盈但恐羈死為鬼客  
客思寄滅生空精每懷舊鄉野念我舊人多悲聲忽見  
過客問何我寧知我家在南城答云我曾居君鄉知君  
遊宦在此城我行離邑已萬里今方羈旅去遠征來時

聞君婦閨中嬌居獨宿有貞名亦云朝悲泣閒房又聞  
暮思淚沾裳形容憔悴非昔悅蓬鬢衰顏不復粧見此  
令人有餘悲當念君懷不暫忘

君不見少壯從軍去白首流離不得還故鄉  
宵宵日夜隔音塵斷絕沮河關朔風蕭條白雲飛胡笳哀邊氣  
寒聽此愁人兮奈何登山遠望得留顏將死胡馬跡寧  
見妻子難男兒生世輒軻欲何道綿憂摧抑起長歎  
君不見柏梁臺今日丘墟生草萊君不見阿房宮寒雲

澤雉棲其中歌伎舞女今誰在高墳壘壘滿山隅長袖  
紛紛徒競世非我昔時千金軀隨酒逐樂任意去莫令  
含歎下黃壚

君不見冰上霜表裏陰且寒雖蒙朝日照信得幾時安  
民生故如此誰令摧折彊相看年去年來自如削白髮  
零落不勝冠

君不見春鳥初至時百草含青俱作花寒風蕭條一旦  
至竟得幾時保光華日月流邁不相饒令我愁思怨恨

多蕭條一  
作蕭索

諸君莫歎貧富貴不由人丈夫四十彊而仕余當二十  
弱冠辰莫言草木萎大雪會應蘓息遇陽春對酒叙長  
篇窮途運命委皇天但願金樽九醞滿莫惜牀頭百箇  
錢直須優游卒一歲何勞辛苦事百年

大一作冬金樽一作樽中

同前

詩品曰行路難是東陽柴廓所造寶月嘗  
憩其家會廓亡因竊而有之廓子齋手本  
出都欲訟此事乃厚賂止之一本云  
東陽太守柴廓選詩外編作柴廓詩

齊僧寶月



君不見孤鴈關外發  
酸嘶度揚越  
空城客子心腸斷  
幽閨思婦氣欲絕  
凝霜夜下拂羅衣  
浮雲中斷開明月  
夜遙遙度相思  
年年望望情不歇  
寄我匣中青銅鏡  
倩人為君除白髮  
行路難行路難  
夜聞南城漢使度  
使我流淚憶長安

同前 四首

梁吳均

洞庭水上一株桐  
經霜觸浪困嚴風  
昔時抽心曜白日  
今旦臥死黃沙中  
洛陽名工見咨嗟  
一剪一刻作琵琶

白壁規心學明月珊瑚映面作風花帝王見賞不見忘  
提攜把握登建章掩抑摧藏張女彈殷勤促柱楚明光  
年年月月對君子遙遙夜夜宿未央未央綵女棄鳴篳  
爭先拂拭生光儀茱萸錦衣玉作匣安念昔日枯樹枝  
不學衡山南嶺桂至今千載猶未知

青瑣門外安石榴連枝接葉夾御溝金墉城西合歡樹  
垂條照彩拂鳳樓遊俠少年遊上路傾心顛倒想戀慕  
摩頂至足買片言開胃瀝膽取一顧自言家在趙邯鄲

翩翩舌杪復劍端青驪白駁的盧馬金羈綠控紫絲繫  
蹀躞橫行不肯進夜夜汗血至長安長安城中諸貴臣  
爭貴儒者席上珍復聞梁王好學問輕棄劒客如埃塵  
吾丘壽王始得意司馬相如適被申大才大辯尚如此  
何況我輩輕薄人

君不見西陵田從橫十字成陌阡君不見東郊道荒涼  
蕪沒起寒煙盡是昔日帝王處歌姬舞女達天曙今日  
翩妍少年子不知華盛落前去吐心吐氣許他人今旦

迴惑生猶豫山中桂樹自有枝心中方寸自相知何言  
歲月忽若馳君之情意與我離還君玳瑁金雀釵不忍  
見此使心危

君不見上林苑中客冰羅霧縠象牙席盡是得意忘言  
者探腸見膽無所惜白酒甜鹽甘如乳綠觴皎鏡華如  
碧少年持名不肯嘗安知白駒應過隙博山鑪中百和  
香鬱金蘓合及都梁逶迤好氣佳容貌經過青瑣歷紫  
房已入中山馮后帳復上皇帝班姬牀班姬失寵顏不

開奉筵供養長信臺日暮耿耿不能寐秋風切切四面  
來玉階行路生細草金鑪香炭變成灰得意失意須臾  
頃非君方寸逆所裁

馮一作陰  
頃一作間

同前

二首前首一作  
吳均今從玉臺

梁費昶

君不見長安客舍門倡家少女名桃根貧窮夜紡無燈  
燭何言一朝奉至尊至尊離宮百餘處千門萬戶不知  
曙唯聞啞啞城上烏玉欄金井牽轆轤丹梁翠柱飛屠  
蘇香薪桂火炊雕胡當年翻覆無常定薄命為女何必

麤

屠一作流雕  
胡一作彫菰

君不見人生百年如流電心中坎壈君不見我昔初入  
椒房時詎減班姬與飛燕朝踰金梯上鳳樓暮下瓊鉤  
息鸞殿柏梁晝夜香錦帳自飄颻笙歌棗下曲琵琶陌  
上桑過蒙恩所賜餘光曲沾被既逢陰后不自專復植  
程姬有所避黃河千年始一清微軀再逢永無議蛾眉  
偃月徒自妍傅粉施朱欲誰為不如天淵水中鳥雙去

雙飛長比翅

棗下曲一作  
席上吹

同前

一作詠征婦  
裁衣行路難

梁王筠

千門皆閉夜何央百憂俱集斷人腸  
探揣箱中取刀尺拂拭機上斷流黃  
情人逐情雖可恨復畏邊遠乏衣裳  
已綠一繭催衣縷復擣百和薰衣香  
猶憶去時腰大小不知今日身短長  
衲襠雙心共一袂相複兩邊作八撮  
襟帶雖安不忍縫開孔裁穿猶未達  
胷前却月兩相連本照君心不照天  
願君分明得此意勿復流蕩不如先  
含悲含怨判不死封情忍思待明年

同前

題云從軍與相州刺史孫騰行路難

北齊高昂

春甲長驅不可息六日六夜三度食初時止言作虎牢  
更被處置河橋北迴首絕望便蕭條悲來雪涕還自抑

空城雀

鮑照此篇言輕飛近集茹腹辛傷免羅網而已

宋鮑照

雀乳四穀空城之阿朝拾野粟夕飲冰河高飛畏鵠鷺  
下飛畏網羅辛傷伊何言怵迫良已多誠不及青鳥速  
食玉山禾猶勝吳宮燕無罪得焚窠賦命有厚薄長歎

欲如何

拾一作食



同前

北魏高孝緯

百雉何寥廓四面風雲上紈素久為塵池臺尚可仰  
啾啾雀噪城鬱鬱無歡賞日暮勞心曲橫琴聊自獎

勞一作縈

夜坐吟

夜坐吟鮑照所作言聽歌逐音因音託意也宗夫又有遇夜吟則言永夜獨吟

憂思未歇  
與此不同

宋鮑照

冬夜沈沈夜坐吟含情未發已知心霜入幕風度林朱

燈滅朱顏尋體君歌逐君音不貴聲貴意深

情一作聲

長相思

古詩曰客從遠方來遺我一書札上言長相思下言久離別李陵詩曰行人難

久留各言長相思言行人久戍寄書以遺所思也古詩又曰客從遠方來遺我一端綺文綵雙鴛鴦裁為合歡被著以長相思緣以結不解謂被中著綿以致相思繇繇之意故曰長相思也又有千里思與此相類

宋吳邁遠

晨有行路客依依造門端人馬風塵色知從河塞還時  
我有同棲結宦遊邯鄲將不異客子分飢復共寒煩君  
尺帛書寸心從此殫道妾長憔悴豈復歌笑顏簷隱千  
霜樹庭枯十載蘭經春不舉袖秋落寧復看一見願道  
意君門已九關虞卿棄相印檐笠為同歡閨陰欲早霜

何事空盤桓

道一作遣  
筌一作簾

同前

梁昭明太子統

相思無終極長夜起歎息徒見貌嬋娟寧知心有憶寸

心無所因願附歸飛翼

嬋一作嬋  
所一作以

同前 二首

張率

長相思久離別美人之遠如雨絕獨延佇心中結望雲  
雲去遠望鳥鳥飛滅空望終若斯珠淚不能雪

長相思久離別所思何在若天垂鬱陶相望不得知玉

階月夕映羅帷風夜吹長思不能寢坐望天河移

同前 二首

陳後主

長相思久相憶關山征戍何時極望風雲絕音息上林書不歸迴紋徒自織羞將別後面還似初相識

長相思怨成悲蝶縈草樹連絲庭花飄散飛入帷帷中看隻影對鏡歛雙眉兩見同望月兩別共春時

同前 二首

徐陵

長相思望歸難傳聞奉詔戍臯蘭龍城遠鴈門寒愁來

瘦轉劇衣帶自然寬念君今不見誰為抱腰看

奉詔一作傳制

念君今不見一作君今念不見

長相思好春節夢裏恒啼悲不洩帳中起牕前髻柳絮  
飛還聚遊絲斷復結欲見洛陽花如君隴頭雪

同前

蕭淳

長相思久離別新燕參差條可結壺闌遠鴈書絕對雲  
恒憶陣看花復愁雪猶有望歸心流黃未剪截

同前

陸瓊

長相思久離別一罷鴛文綺薦絕鴻已去柳堪結室冷  
鏡疑冰庭幽花似雪容貌朝朝改書字看看減

同前

王嗟

長相思久離別兩心同憶不相徹悲風悽愁雲結柳葉  
眉上銷菱花鏡中減鴈封歸飛斷鯉素還流絕

悽一作淒

同前 二首

江總

長相思久離別征夫去遠芳音減湘水深隴頭咽紅羅  
斗帳裏綠綺清弦絕逶迤百尺樓愁思三秋結

芳音一作芳幽

長相思久別離春風送燕入簷窺暗開脂粉弄花枝紅  
樓千愁色玉筍兩行垂心心不相照望望何由知

同前

無名氏

罷秋有餘慘還春不覺溫詎知玉筵側長挂銷愁人

長別離

楚辭曰悲莫悲兮生別離古詩曰行行重行行與君生別離相去萬餘里各在

天一涯後蘇武使匈奴李陵與之詩曰良時不可再離別在須臾故後人擬之為古別離  
梁簡文帝又為生別離宋吳邁遠有長別離  
今按三曲原本同義而宋在梁前聊以為次

宋吳邁遠

生離不可聞，況復長相思。如何與君別，當我盛年時。  
蕙華每搖蕩，妾心長自持。榮乏草木歡，悴極霜露悲。  
富貴貌難變，貧窮顏易衰。持此斷君腸，君亦宜自疑。  
淮陰有逸將，折羽謝翻飛。楚有扛鼎士，出門不得歸。  
正為隆準公，仗劍入紫微。君才定何如，白日下爭暉。

長一作空  
貌一作身

古別離

裸體詩  
第一首

梁江淹

遠與君別者，乃至鴈門關。黃雲蔽千里，遊子何時還。  
送君如昨日，簷前露已團。不惜蕙草晚，所悲道里寒。  
君在



天一涯妾身長別離願一見顏色不異瓊樹枝兔絲及  
水萍所寄終不移

生別離

梁簡文帝

別離四弦聲相思雙笛引一去十三年復無好音信

淫思古意

宋顏竣

春風飛遠方紀轉流思堂貞節寄君子窮閨妾所藏裁  
書露微疑千里問新知君行過三稔故心久當移

楊花曲

三首

宋湯惠休

歲華結情宛轉風含思掩涕守春心折蘭還自遺  
江南相思引多歎不成音黃鶴西北去銜我千里心  
深堤下生草高城上入雲春人心生思思心長為君

秋思引

宋湯惠休

秋寒依依風過河白露蕭蕭洞庭波思君未光光已滅  
眇眇悲望如思何

勞歌二首

宋伍緝之

幼童輕歲月謂言可久長一朝見零悴歎息向秋霜  
迤

遭已窮極疾病復不康每恐先朝露不見白日光庶及  
盛年時暫遂情所望吉辰既乖越來期眇未央促促歲  
月盡窮年空悲傷

女蘿依附松終已冠高枝浮萍生託水至死不枯萎傷  
哉抱關士獨無松與期月色似冬草居身苦且危幽生  
重泉下窮年冰與澌多謝負郭生無所事六奇勞為社  
下宰時無魏無知

同前

周蕭撫

百年能幾許公事罷平生寄言任立政誰憐李少卿

答孫緬歌

南史曰漁父者不知姓名亦不知何許人太康孫緬為潯陽太守落日道

逕渚際見一輕舟凌波隱顯俄而漁父至神韻蕭灑垂綸長嘯緬甚異之褰裳涉水與之論用世之道漁父曰僕山海狂人不達世務未辨賤貧無論榮貴乃歌曰云云於是攸然而去

宋漁父

竹竿籊籊河水泚泚相忘為樂貪餌吞鉤非夷非惠聊以忘憂



古樂苑卷三十六

欽定四庫全書

集部

古樂苑卷三十七

詳校官編修<sub>臣</sub>李堯棟

主事銜<sub>臣</sub>徐以坤覆勘

總校官降調編修<sub>臣</sub>倉聖脉

校對官主事<sub>臣</sub>陳文樞

謄錄監生<sub>臣</sub>衛子忠

欽定四庫全書

古樂苑卷三十七

明 梅鼎祚 編

襍曲歌辭

齊

塞客吟

齊書曰高帝在淮上取蘇侃為冠軍錄事參軍是時新失淮北遣帝北戍每歲

秋冬間還淮騷動帝廣遣偵候安集荒餘又營繕城府帝在兵中久見疑於時乃作塞客

吟以喻志侃達此旨更自勸勵委以府事深見知待按此詩見蘇侃傳外編逸軌皆作侃

詩非也

齊高帝

寶緯秦宗神經越序德晦河晉力宣江楚雲雷兆壯天  
山繇武直髮指河關凝精越漢渚秋風起寒草哀雕鴻  
思邊馬悲平原千里顧但見轉蓬飛星嚴海淨月徹河  
明清輝映幙素液凝庭金笳夜厲羽轄晨征幹晴潭而  
悵泗杞松洲而悼情蘭涵風而瀉豔菊籠泉而散英曲  
繞首燕之歎吹軫絕越之聲歛園琴之孤弄想庭藿之  
餘馨青闕望斷白日西斜恬源靚霧壠首暉霞戒旋鷗  
躍還波情綿綿而方遠思裊裊而遂多粵擊秦中之筑



因為塞上之歌歌曰朝發兮江泉日夕兮陵山驚飈兮  
涕汨淮流兮潺湲胡埃兮雲聚楚旆兮星懸愁塘兮思  
宇惻愴兮何言定寰中之逸鑒審雕陵之迷泉悟樊籠  
之或累悵遐心以栖玄

河關一作秦關

永明樂

十首南齊書樂志曰永明樂歌者竟陵王子良與諸文士造奏之人為十曲道人釋寶月辭頗美武帝常被之筦弦而不列於樂官按此曲永明中造故曰永明樂

齊謝朓

帝圖開九有皇風浮四溟永明一為樂咸池無復靈

民和禮樂富世清歌頌徽鴻名軼卷領稱首邁垂衣  
朱臺鬱相望青槐紛馳道秋雲湛甘露春風散芝草  
龍樓日月照淄館風雲清儲光溫似玉藩度式如瓊  
化洽鯁海君恩變龍庭長西北驚環裘東南盡龜象  
出車長洲苑選旅朝夕川絡絡結雲騎奕奕汎戈船  
燕駟遊京洛趙服麗有輝清歌留上客妙舞送將歸  
實相薄五禮妙花開六塵明祥已玉燭寶瑞亦金輪  
生茂苻蘿性身與嘉惠隆飛纓入華殿屣步出重宮

彩鳳鳴朝陽玄鶴舞清商瑞此永明曲千載為金皇

同前 十首

王融

玄符昭景歷茂實偶英聲長為南山固永與朝日明  
靈丘比翼栖芳林合條起兩代分憲章一朝會書軌  
二離金玉相三袞蘭蕙芳重儀文世子再奉東平王  
空谷返逸驂陰山響鳴鶴振玉躡丹墀懷芳步青閣  
崇文晦已明膠庠襍復整弱臺留析巾沂川詠芳穎  
定林去喧俗鹿野出埃霞香風流梵瑄澤雨散雲花

楚望傾澠滌日館仰鑾鈴已晞五雲發方照兩河清  
幸哉明盛世壯矣帝王居高門夜不析飲帳曉長舒  
揔棹金陵渚方駕玉山阿輕露炫珠翠初風搖綺羅  
西園抽蕙草北沼掇芳蓮生逢永明樂死日生之年

同前

梁沈約

聯翩賔遊子侈靡千金客華轂起飛塵珠履竟長陌

江上曲

齊謝朓

易陽春草出踟躕日已暮蓮葉尚田田淇水不可渡願

子淹桂舟時同千里路千里既相許桂舟復容與江上  
可採菱清歌共南楚

邯鄲故才人嫁為廝養卒婦

楊慎樂府序曰予觀樂府有邯鄲才

人嫁為廝養卒婦篇特亡其辭亦失其辭及  
考史記張耳傳洎楚漢春秋并云趙王武臣  
為燕軍所獲囚於燕獄先後使者往請輒為  
燕所殺趙有廝養卒謝其舍中曰吾將載趙  
王歸舍中人笑之乃走燕壁以利害說燕將  
燕以為然乃歸趙王廝養卒御王以歸武臣  
歸趙以笑人妻養卒以報之是其事也李蒙  
曰張耳傳祇云廝養卒並無才人嫁為婦語  
曷以知所嫁者即此卒邪陳耀文正揚曰  
此事史漢并同注中俱無楚漢春秋字

齊謝朓

生平宮閣裏出入侍丹墀開筭方羅縠窺鏡比蛾眉初  
別意未解去久日生悲顚顚不自識嬌羞餘故姿夢中  
忽髣髴猶言承讌私

王孫遊

楚辭招隱士曰王孫遊兮不歸春  
草生兮萋萋王孫遊蓋出於此

齊謝朓

綠草蔓如絲襟樹紅英發無論君不歸君歸芳已歇

蔓

夢作

同前

王融

置酒登廣殿開襟望所思春草行已歇何事久佳期

一本

辭同思

公子

金谷聚

齊謝朓

渠碗送佳人玉杯要上客車馬一東西別後思今夕

石崇金谷妓

梁庾肩吾

蘭堂上客至綺席清絃撫自作明君辭還教綠珠舞

法壽樂

十二首一  
云法樂辭

齊王融

天長命自短世促道悠悠禪衡開遠駕愛海亂輕舟累  
塵曾未極積樹豈能籌情埃何用洗正水有清流

積一作心

右歌本起

百神肅以虔三靈震且越恒耀揜芳霄薰風鏡蘭月丹

榮藻玉墀翠羽文珠闕皓毳非虛來交輪豈徒發

薰風鏡蘭

月一作微風動蘭月  
藻一作落恒一作常

右歌靈瑞

韶年春已仲明星夜未央千祀鍾休歷萬國會嘉祥金



容涵夕景翠髻佩晨光表塵維淨覺汎俗廼輪皇

右歌下生

襲氣變離宮重柝警曾殿曼響感心神修容展歡宴生

老終已榮死病行當薦方為淨國遊豈結危城戀

展歡一作

轉惟

右歌在宮

春木多病夭秋葉少欣榮心骸終委滅親愛暫平生長

風吹北壟迅影急東瀛知三既情竭得一乃身貞

木一作枝

竭一  
作暢

右歌四遊

飛策辭國門端儀偃郊樹慈愛徒相思閨中空戀慕  
夙隸乖往塗駿足獨歸路舉袂謝時人得道且還顧

一作去

右歌出國

明心弘十力寂慮安四禪青禽承逸軌文驪鏡重川  
驚崑標遠勝鹿野究清玄不有希世寶何以遵蒙泉

安一作通

驪一  
作鑣

右歌得道

亭亭宵月流朏朏晨霜結川上不棄回條間亟渝滅靈

知湛常然符應有盈缺感運復來儀且厭人間世

並渝滅一

作問生滅符一  
作俯世音泄

右歌寶樹

一作  
雙樹

春山玉所府檀林鸞所栖引火歸炎隧挹水自青隄菴

園無異轍祇館有同躋比肩非今古接武豈燕齊

春一作春

鸞一作芳

右歌賢衆

昔余輕歲月茲也重光陰閨中屏鉛黛闕下挂纓簪禪

悅兼芳旨法言戀清琴一異非能辨寵辱誰為心

應一作忘

寵辱一作空有

右歌學徒

峻宇臨層穹迢迢疎速風騰芳清漢裏響梵高雲中金

華紛冉若瓊樹鬱青葱貞心延淨景邃業嗣天宮

宇一作岸

冉若一作冉  
弱延一作逸

右歌供具

影響未嘗隔晦明殊復親弘慈邈已遠睿后肩高塵區  
中提景福寓外沐深仁萬祀留國祚億兆慶唐民

右歌福應

江臯曲

齊王融

林斷山更續洲盡江復開雲峰帝鄉起水源桐柏來

望城行

齊王融

金城十二重雲氣出表裏萬戶如不殊千門反相似車

馬若飛龍長衢無極已簫鼓相逢迎信哉佳城市

思公子

楚辭九歌曰雷填填兮雨冥冥援欸欸兮杭夜鳴風颯颯兮木蕭蕭思公子兮

徒離憂思公子蓋出於此

齊王融

春盡風颯颯蘭凋木脩脩王孫久為客思君徒自憂

同前

梁費昶

公子才氣饒凌雲自飄飄東出關雞道西登飲馬橋夕

宴銀為燭朝燔桂作樵虞卿亦何命窮極苦無聊

同前

北齊邢劭

綺羅日減帶桃李無顏色思君君未歸歸來豈相識

陽翟新聲

隋書樂志曰西涼樂曲陽翟新聲神自馬之類皆出於胡戎歌非漢魏遺

曲也

齊王融

懷春發下蔡含笑向陽城耻為飛雉曲好作鷓鴣鳴

秋夜長

魏文帝詩曰漫漫秋夜長烈烈北風涼展轉不能寐披衣起彷徨秋夜長其取

諸此集云奉和秋夜長玉臺作秋夜

齊王融

秋夜長夜長樂未央舞袖拂花燭歌聲繞鳳梁

白日歌

序曰懸象著明莫大乎日月而彼日月不能  
不謝固知無準衰為盛之終盛為衰之始故

為白

日歌

齊張融

白日白日舒天昭暉數窮則盡盛滿則衰

憂且吟

齊張融

鳴琴當春夜春夜當鳴琴羈人自不樂何似千里心

邯鄲行

通典曰邯鄲戰國時趙國所都自敬侯  
始都之有叢臺洪波臺在焉邯山名邯

盡也樂府廣題

曰邯鄲舞曲也

齊陸厥

趙女振鳴琴邯鄲紛躑步長袖曳三街兼金輕一顧有



美獨臨風佳人在遐路相思欲褰袞叢臺日已暮

邯鄲歌

詩彙列在  
晉無名氏

梁武帝

回顧瀟陵上北指邯鄲道短衣妾不傷南山為君老

南郡歌

齊陸厥

江南可採蓮蓮生荷已大旅鴈向南飛浮雲復如蓋望  
美積風露踈麻成襟帶雙珠惑漢臯蛾眉迷下蔡玉齒  
徒粲然誰與啟含貝

京兆歌

通典曰京兆馮翊扶風皆古雍州之域  
秦始皇以為內史漢景帝二年分置左

右內史武帝改左內史為左馮翊右  
內史為右扶風後與京兆號三輔

齊陸厥

兔園夾池水脩竹復檀欒不如黃山苑儲胥與露寒  
邈迤傍無界岑崟鬱上千上千入翠微下趾連長薄芳  
露浸紫莖秋風搖素萼鴈起宵未央雲間月將落照  
梁桂兮影裴回承露盤兮光照灼壽陵之街走狐兔  
金匱玉盤會銷鑠願奉蒲萄花為君實羽爵

岑崟一作崟岑

左馮翊歌

齊陸厥

上林滴紫泉離宮赫千戶飛鳴亂鳬鴈參差襟蘭杜比翼獨未羣連葉誰為伍一物或難致無云泣易覩

中山孺子妾歌

二首漢書曰詔賜中山靖王子噲及孺子妾永未央才人歌詩

四篇如淳曰孺子幼少稱孺子妾宮人也顏師古曰孺子王妾之有品號者妾王之衆妾也永其名才人天子內官按此謂以歌詩賜中山王及孺子妾未央才人等爾累言之故云及也而陸厥作歌乃謂之中山孺子妾失之遠矣藝文志又曰臨江王及愁思節士歌詩四篇李夫人及幸貴人歌詩三篇亦皆累辭也

齊陸厥

未央才人中山孺子一笑傾城一顧傾市傾城不自美

傾市復為容願把陵陽袖披雲望九重

如姬寢臥內班婕坐同車洪波陪飲帳林光宴秦餘歲

暮寒飈及秋水落芙蓉子瑕矯後駕安陵泣前魚賤妾

終已矣君子定焉如

婕一作妾賤妾終已矣一作賤妾恩已畢

未央才人歌

梁庾肩吾

從來守未央轉欲訝春芳朝風凌日色夜月奪燈光相逢儻遊豫暫為卷衣裳

臨江王節士歌

齊陸厥

木葉下江波連秋月照浦雲歇山秋思不可裁復帶秋  
風來秋風來已寒白露驚羅紈節士慷慨髮衝冠彎弓  
挂若木長劒竦雲端

李夫人及貴人歌

齊陸厥

屬車桂席塵豹尾香煙滅彤殿向薜蘿青蒲復萎絕坐  
萎絕對薜蘿臨丹階泣椒塗寡鶴羈雌飛且止雕梁翠  
壁網蜘蛛洞房明月夜對此淚如珠

丹一作玉

古樂苑卷三十七

欽定四庫全書

古樂苑卷三十八

明 梅鼎祚 編

雜曲歌辭

梁

東飛伯勞歌

一云紹古歌玉臺  
藝文樂府作古辭

梁武帝

東飛伯勞西飛鶯黃姑織女時相見誰家兒女對門居  
開顏發豔照里閭南牕北牖桂月光羅帷綺帳脂粉香  
女兒年幾十五六窈窕無雙顏如玉三春已暮花從風

空留可憐誰與同

同前

二首 英華  
作 紹古歌

梁簡文帝

翻階蛺蝶戀花情  
容華飛燕相逢迎  
誰家總角歧路陰  
裁紅點翠愁人心  
天牕綺井曉徘徊  
珠簾玉篋明鏡臺  
可憐年幾十三四  
工歌巧舞入人意  
白日西落楊柳垂  
含情弄態兩相知

西飛迷雀東羈雉  
倡樓秦女乍相值  
誰家妖麗鄰中止  
輕粧薄粉光閨里  
網戶珠綴曲瓊鉤  
芳茵翠被香氣流



少年年幾方三六含嬌聚態傾人目餘香落蕊坐相催

可憐絕世誰為媒

一作為誰媒

同前

題云擬古應教  
英華作簡文帝

劉孝威

雙棲翡翠兩鴛鴦巫雲洛月乍相望誰家妖冶折花枝

衫長釧動任風吹金鋪玉鎖瑠璃扉花鈿寶鏡織成衣

美人年幾可十餘含羞騁笑斂風裾珠丸出彈不可追

空留可憐持與誰

衫長句一作蛾眉  
青玉作綠花鈿句作瓊筵  
玉筍金縷

衣

同前

陳後主

池側鴛鴦春日鶯綠珠絳樹相逢迎誰家佳麗過淇上  
翠釵綺袖波中漾雕軒繡戶花恒發珠簾玉砌移明月  
年時二七猶未笄轉顧流盼鬢髮低風飛蕊落將何故

可惜可憐空擲度

將一作時

同前

陸瑜

西王青鳥秦女鸞姮娥婺女慣相看誰家玉顏窺上路  
粉色衣香雜風度九重樓檻芙蓉華四鄰照鏡菱菱花

新粧年幾纔三五  
隱幔藏羞臨網戶  
然香氣歇不飛煙  
空留可憐年一年

同前

一作紹  
古歌

江總

南飛烏鵲北飛鴻  
弄玉蘭香時會同  
誰家可憐出牕牖  
春心百媚勝楊柳  
銀牀金屋挂流蘇  
寶鏡玉釵橫珊瑚  
年時二八新紅臉  
宜笑宜歌羞更斂  
風花一去杳不歸  
祇為無雙惜舞衣

同前

隋辛德源

合歡芳樹連理枝  
荆王神女乍相隨  
誰家妖豔蕩輕舟  
含嬌轉盼騁風流  
犀棹蘭橈翠羽蓋  
雲羅霧縠蓮花帶  
女兒年幾十六七  
玉面新粧映朝日  
落花從風俄度春  
空留可憐何處新

河中之水歌

藝文作  
古辭

梁武帝

河中之水向東流  
洛陽女兒名莫愁  
莫愁十三能織綺  
十四採桑南陌頭  
十五嫁為盧家婦  
十六生兒字阿侯  
盧家蘭室桂為梁  
中有鬱金蘇合香  
頭上金釵十二行

足下絲履五文章珊瑚掛鏡爛生光平頭奴子擎履箱  
人生富貴何所望恨不早嫁東家王

擎一作提

閭闔篇

張衡西京賦曰表峽闕於閭闔閭闔天門也立高闕以象之薛綜云紫微宮門

名曰閭闔也閭闔篇蓋出於此

梁武帝

西漢本佳妍金馬望甘泉衛尉屯兵上期門曉漏傳猶  
重河東賦欲知追神仙羽騎凌雲轉閭闔帶空懸長旗  
掃月窟鳳迹輾星躔但使丹砂就能令億萬年

上林

梁昭明太子統

千金駿裏騎萬斤流水車爭遊上林裏高蓋逗春華

一裏

苑作

大言

許彥周詩話曰樂府記大言小言詩錄昭明辭而不書始於宋玉何也豈誤耶有說

耶按此則大言細言在宋時亦已載樂府矣詩家直說曰宋玉大言賦并吞四夷飲枯河海跋越九州無所容止小言賦無內之中微物生焉比之無象言之無名視之則渺渺望之則冥冥離婁為之歎悶神明不能察其情二賦出於列子皆有託寓梁昭明太子大言詩細言詩雖祖宋玉而無謂君臣廢和以文為戲

梁昭明太子統

下同

觀修鵬其若轍鮒視滄海之如濫觴經二儀而跼蹐跨

六合以翱翔

細言

坐卧鄰空塵憑附  
蟪蛄翼越咫尺而三秋度毫釐而九息

大言

並應令

沈約

下同

隘此大汎庭方知九垓局窮天豈彌指盡地不容足

細言

開館尺椳餘築榭微塵裏蝸角列州縣毫端建朝市

大言

王錫

下同

欲遊五嶽迫不得申杖千里之木鱸橫海之鱗

細言

冥冥藹藹離朱不辯其實步蝸角而三伏經針孔而千  
日

大言

王規

下同

俯身望日入下視見星羅噓八風而為氣吹四海而揚  
波



細言

針鋒於焉止息髮杪可以翱翔蚊眉深而易阻蟻目曠而難航

大言

張纘

下同

河流既竭日月俱騰罍羅微物動落雲鵬

細言

遨遊蟻目辨輕塵蚊睫成宇蝨如輪

大言

殷鈞

下同

金少卿詩集卷三十八  
噫氣為風揮汗成雨聊灼戴山龜欲持探邃古

細言

汎舟毛滴海為政蝸牛國逍遙輕塵上指辰問南北

春江行

唐郭元振曰春  
江巴女曲也

梁簡文帝

客行祗念路相爭渡京口誰知堤上人拭淚空搖手

桃花曲

一作蕭  
子顯

梁簡文帝

但使新花豔得間美人簪何須論後實怨結子瑕心

金樂歌

通志作  
今樂歌

梁簡文帝

槐香欲覆井楊柳正藏鴟山鑪當無比玉構火牕賒牀  
頭辟繩結鏡上領巾斜鐵鑊種梁子銅樞生棗花開門  
拋水柱城按持言家

當一作好  
柱一作信

同前

集云歌  
曲名詩

元帝

啼鳥怨別偶曙鳥憶離家石闕題書字金燈飄落花東  
方曉星沒西山晚日斜穀衫迴廣袖團扇掩輕紗暫借  
青驄馬來送黃牛車

沒一作渡

同前

房篆

前溪流碧水後渚映青天登臺臨寶鏡開牕對綺錢玉  
顏光粉色羅袖拂金鈿春風散輕蝶明月映新蓮摘花  
競時侶催指及芳年

采菊篇

梁簡文帝

月精麗草散秋株洛陽少婦絕妍姝相喚提筐采菊珠  
朝起露濕霑羅襦東方千騎從驪駒豈不下山逢故夫

喚一作吁  
豈一作更

茱萸女

梁簡文帝

茱萸生狹斜結子復銜花  
遇逢纖手摘濫得映鉛華  
雜與鬟簪插偶逐鬢鈿斜  
東西爭贈玉縱橫來問家  
不無夫婿馬空駐使君車

愛妾換馬

樂府解題曰愛妾換馬舊說淮南王所作疑淮南王即劉安也古辭今不

傳人以妾換馬題云和人

梁簡文帝

功名幸多種何事苦生離  
誰言似白玉定是媿青驪  
必取匣中釧迴作飾金羈  
真成恨不已願得路傍兒

同前

題云和王竟陵

劉孝威

驄馬出樓蘭一步九盤桓小史贖金絡良工送玉鞍龍  
驂來甚易烏孫去實難麟膠妾猶有請為急弦彈

同前

庾肩吾

渥水出騰駒湘川實應圖來從西北道去逐東南隅琴  
聲悲玉匣山路泣蘼蕪似鹿將含笑千金會不俱

同前

隋僧法宣

朱鬣飾金鑣紅粧束素腰似雲來蹀躞如雪去飄飄桃  
花含淺汗柳葉帶餘嬌騁先將獨立雙絕不俱標

行幸甘泉宮

漢書武帝太始三年正月行幸甘泉宮

梁簡文帝

雉歸海水寂，裘來重譯通。  
吉行五十里，隨處宿離宮。  
鼓聲恒入地，塵飛上暗空。  
尚書隨豹尾，太史逐相風。  
銅鳴周國鑾，旗曳楚雲虹。  
倖臣射覆罷，從妓新歌終。  
董桃拜金紫，賢妻侍禁中。  
不羨神仙侶，排煙逐駕鴻。

尚一作教  
妓一作騎

同前

題末有  
歌字

劉孝威

漢家迎夏畢，避暑甘泉宮。  
棧車鳴里鼓，駟馬駕相風。  
校

尉烏桓騎待制樓煩弓後旌猶五柞前笳度九峻才人  
豹尾內御酒屬車中輦迴百子閣扇動七輪風鳴鐘休

衛士披圖召後宮材官促校獵涼秋戲射熊

涼秋一作秋來

名士悅傾城

題云和湘東王藝文作昭明非

梁簡文帝

美人稱絕世麗色譬花叢雖居李城北住在宋家東教  
歌公主第學舞漢成宮多遊淇水上好在鳳樓中履高  
疑上砌裾開特畏風衫輕見跳脫珠概雜青蟲垂絲遠  
帷幔落日度房櫳粧牕隔柳色井水照桃紅非憐江浦



珮羞使春閨空

住在一作往來  
江浦一作交甫

同前

題云敬酬劉長史  
詠名士悅傾城

劉綏

不信巫山女不信洛川神何關別有物還是傾城人  
經共陳王戲曾與宋家鄰未嫁先名玉來時本姓秦  
粉光猶似面朱色不勝唇遙見疑花發聞香知異春  
釵長逐鬟髮小稱腰身夜夜言嬌盡日日態還新  
工傾荀奉倩能迷石季倫上客徒留目不見正橫陳

髮一作鬢

獨處怨

司馬相如美人賦曰芳香郁烈黼帳高張有女獨處婉然在牀乃歌曰獨處室

今廓無依思佳人兮情傷悲獨  
處怨蓋取諸此一作獨處愁

梁簡文帝

獨處恒多怨開幕試臨風彈碁鏡奩上傅粉高樓中自

君征馬去音信不曾通只恐金屏掩明年已復空

君一作從

樹中草

一作蕭子顯

梁簡文帝

幸有青袍色聊因翠幄凋雖間珊瑚蒂非是合歡條

半路溪

樂府作元帝

梁簡文帝

相逢半路溪隔溪猶不渡望望判知是翩翩識行步摘

贈蘭澤芳欲表同心句先將動舊情恐君疑妾妬

將一作持

### 春情曲

詞品曰梁簡文帝春情曲似七言律而未句又用五言王無功亦有此體又唐律

之祖而唐辭瑞鵲鵲格韻似之今按其集題云春情初不言曲且陳隋人亦多春情詩楊

氏或別有據聊附于此

### 梁簡文帝

蝶黃花紫燕相追楊低柳合露塵飛已見垂鈎挂綠樹  
誠知淇水霑羅衣兩童夾車問不已五馬城南猶未歸  
鶯啼春欲駛無為空掩扉

### 倡樓怨節

宋鄭樵樂府遺聲怨思二十五曲有倡樓怨簡文又有倡婦怨情十二韻

詩不錄

梁簡文帝

朝日斜來照戶春鳥爭飛出林片光片影皆麗一聲一轉煎心上林紛紛花落淇水漠漠苔浮年馳節流易盡

何為忍憶含羞

此疑二首

金閨思

按閨思閨怨或叙棄捐或陳征戍大畧皆懷遠傷離之意魏曹植有閨情詩至

梁陳間始為此題唐益多擬作矣郭左諸家俱不見載樂府遺聲有閨思閨怨秋閨怨今

從之其他各以類附

梁簡文帝

遊子久不返妾身當何依日移孤影動羞覩燕雙飛

自君之別矣不復染膏脂南風送歸雁聊以寄相思

閨思

梁范雲

春草醉春煙深閨人獨眠積恨顏將老相思心欲然幾  
回明月夜飛夢到郎邊

同前

隋羅愛愛

幾當孤月夜遙望七香車羅帶因腰緩金釵逐髻斜

春閨思

梁蕭子顯

金羈遊俠子綺機離思妾春度人不歸望花盡成葉

秋閨夜思

梁簡文帝

非關長信別詎是良人征九重忽不見萬恨滿心生夕  
門掩魚鑰宵牀悲畫屏迴月臨牕渡吟蟲繞砌鳴初霜  
實細葉秋風驅亂螢故粧猶累日新衣製未成欲知妾  
不寐城外搗砧聲

駟一作吹

閨怨

玉臺作蕭綸題云  
代秋胡婦閨怨

梁元帝

蕩子從遊宦思妾守房櫳塵鏡朝朝掩寒衾夜夜空若  
非新有悅何事久西東知人相憶否淚盡夢啼中

同前 二首

吳均

胡笳屢悽斷征蓬未肯還  
妾坐江之介君戍小長安  
相去三千里參商書信難  
四時無人見誰復重羅紈

春草可攬結妾心正斷絕  
綠鬢愁中改紅顏啼裏滅  
非獨淚成珠亦見珠成血  
願為飛鵲鏡翩翩照離別

飛鵲一作

雙鵲

同前

劉孝儀

本無金屋寵長作玉階悲  
一乖西北麗寧復城南期永

巷愁無歇應門閉有時空勞織素巧徒為團扇辭匡牀  
終不共何由橫自私

敬玉臺作盡

同前

陸罩

自憐斷帶日偏恨分釵時留步惜餘影含意結愁眉徒  
知今異昔空使怨成思欲以別離思獨向薜蘿無悲

同前

一云和陰梁州雜怨今從藝文

鄧鏗

暫別猶添恨何忍別經時叢桂頻銷葉庭樹幾攀枝君  
言妾貌改妾畏君心移終須一相見併得兩相知



同前

題云閨怨篇

陳江總

寂寂青樓大道邊  
紛紛白雪綺窗前  
池上鴛鴦不獨自  
帳中蘇合還空然  
屏風有意障明月  
燈火無情照獨眠  
遼西水凍春應少  
薊北鴻來路幾千  
願君關山及早度  
念妾桃李片時妍

同前

藝文作江總次閨怨篇下玉臺作梁簡文和蕭子顯春別

蜘蛛作絲滿帳中  
芳草結葉當行路  
紅臉脈脈一生啼  
黃鳥飛飛有時度  
故人雖故昔經新  
新人雖新復應故

同前

陳吳思玄

金風響洞房佳人心自傷  
淚隨明月下愁逐漏聲長  
燈前羞獨鵲枕上怨孤凰  
自覺鴛帷冷誰憐珠被涼

同前

周庾信

明鏡圓花發空房故怨多  
幾年留織女還應聽渡河

春閨怨

梁王僧孺

愁來不理鬢春至更攢眉  
悲看蛺蝶粉泣望蜘蛛絲月  
映寒蛩褥風吹翡翠帷飛鱗難託意  
駛翼不銜辭

銜一作綴

同前

吳孜

玉關信使斷借問不相諳春光太無意窺牕來見參分  
與光音絕忽值日東南柳枝皆颺燕桑葉復催蠶物色  
頓如此孀居自不堪

秋閨怨

梁王僧孺

斜光隱西壁暮雀上南枝風來秋扇屏月出夜燈吹深  
心起百際遙淚非一垂徒勞妾辛苦終言君不知

同前

二首一云閨  
怨今從玉臺

何遜

竹葉響南牕月光照東壁誰知夜獨覺枕前雙淚滴

閨閣行人斷房櫳月影斜誰能北牕下獨對後園花

集作

誰知北牕下  
猶對後園花

同前

陳陰鏗

獨眠雖已慣秋來只自愁火籠恒煖脚行障鎮牀頭  
眉含黛俱斂啼將粉共流誰能無別恨唯守一空樓

離閨怨

題云和蒲  
諮議岑

梁何遜

曉河沒高棟斜月半空庭牕中度落葉簾外隔飛螢  
含

情下翠帳掩涕閉金屏昔期今未返春草寒復青思君

無轉易何異北辰星

情一作悲  
弟一作泣

空閨怨

陳江總

蕩妻怨獨守盧姬傷獨居瑟上調絃落機中織素餘自  
羞淚無燥翻覺夢成虛復嗟長信閣寂寂往來疎

南征閨怨

陳陰鏗

湘水舊言深征客理難尋獨愁無處道長悲不自禁逢  
人憎解佩來鴻懶聽音唯當有夜鵲南飛似妾心

來鴻  
一作

從來

山家閨怨

陳張正見

王孫春好遊雲鬢不勝愁  
離鴻暫罷曲別路已經秋  
山中桂花晚勿為俗人留

同前

李爽

山中多早梅荆扉達曙開  
竹巾君自拆荷衣誰為裁  
行雲無處所人住在陽臺

晚棲烏

文苑英華作樂府姑從之  
隋虞世基有晚飛烏不錄

梁元帝

日暮連翩翼俱向上林棲風多前鳥駛雲暗後羣迷路  
遠聲難徹飛斜行未齊應從故鄉返幾過入蘭閨借問  
倡樓妾何如蕩子妻

攜手曲

攜手曲梁沈約所制也樂府解題曰攜手曲言攜手行樂恐芳時不留君恩將

歌也

梁沈約

捨轡下雕輅更衣奉玉牀聯簪映秋水開鏡比春粧所  
畏紅顏促君恩不可長鵲冠且容裔豈吝桂枝亡

聯一作斜

同前

吳均

豔裔陽之春攜手清洛濱雞鳴上林苑薄暮小平津長  
裾藻白日廣袖帶芳塵故交一如此新知詎憶人

夜夜曲

二首北斗一首一作簡文夜夜曲梁沈約所作也樂府解題曰夜夜曲傷獨處

也

梁沈約

河漢縱且橫北斗橫復直星漢空如此寧知心有憶孤  
燈暖不明寒機曉猶織零淚向誰道雞鳴徒歎息  
北斗闌干去夜夜心獨傷月輝橫射枕燈光半隱牀



同前

二首後首樂府無名氏玉臺作  
簡文題云擬沈隱侯故附約後

簡文帝

靄靄夜中霜  
河開向曉光  
枕啼常帶粉  
身眠不著牀  
蘭膏盡更益  
薰鑪滅復香  
但問愁多少  
便知夜短長

愁人夜獨傷  
滅燭卧蘭房  
祗恐多情月  
旋來照妾牀

樂未央

梁沈約

億舜日萬堯年  
詠湛露歌採蓮  
願雜百和氣  
宛轉金鑪前

六憶詩

四首

梁沈約

憶來時灼灼上堦墀  
勤勤叙離別慊慊道相思  
相看常不足相見乃忘飢

憶坐時點點羅帳前  
或歌四五曲或弄兩三弦  
笑時應無比嗔時更可憐

憶食時臨盤動容色  
欲坐復羞坐欲食復羞食  
含哺如不飢擎甌似無力

憶眠時人眠彊未眠  
解羅不待勸就枕更須牽  
復恐傍

人見嬌羞在燭前

雜憶詩

二首見隋遺錄題云效劉孝綽雜憶詩按劉集無此詩惟沈約有六憶詞品作

煬帝夜飲  
朝眠曲

隋煬帝

憶睡時待來剛不來卸粧仍索伴解佩更相催博山思  
結夢沈水未成灰

憶起時投籤初報曉被惹香黛殘枕隱金釵裊笑動林

中鳥除却司晨鳥

笑動林中鳥一作笑動上林中

征怨

梁江淹

蕩子從征久鳳樓  
簫管閒獨枕凋雲鬢  
孤燈損玉顏何  
日邊塵淨庭前征馬還

同前

丘遲

清歌自信妍雅舞空僊  
僊耳中解明月頭上落金鈿  
雀飛且近遠暮入綺牕前  
魚戲雖南北終還荷葉邊  
惟見君行久新年非故年

登城怨

梁范雲

楚妃歌脩竹漢女奏幽蘭  
獨以閨中笑豈知城上寒

登高臺

梁王僧孺

試出金華殿聊登銅雀臺九路平如掌千門洞已開軒

車映日過簫管逐風來若非邯鄲美便是洛陽才

字一作砥

同前

題云宮殿名登高臺詩

陳祖孫登

獨有相思意聊啟鳳皇臺蓮披香稍上月明光正來離

鵠將雲散飛花似雪迴遙思竹林友前牕夜夜開

鵠一作鶴

古通用

滄海雀

梁張率

大雀與黃口來自滄海區清晨啄原粒日夕依野株雖  
憂驚鳥擊長懷沸鼎虞況復隨時起翻飛不可拘寄言  
挾彈子莫賤隋侯珠

清涼

梁張率

登臺待初景帳殿藹餘晨羅帳夕風濟清氣尚波人長  
簟涼可仰平莞溫未親幸願同枕席為君橫自陳

芳林篇

梁柳惲

芳林暄兮發朱榮時既晚兮隨風零隨風零兮返無期

安得陽華遺所思

起夜來

樂府解題曰起夜來其辭意猶念時昔思君之來也

梁柳惲

城南斷車騎閣道覆青埃  
露華光翠網月影入蘭臺  
洞房且莫掩應門或復開  
颯颯秋桂響非君起夜來

獨不見

樂府解題曰獨不見傷思而不得見也

梁柳惲

別島望雲臺天淵臨水殿  
芳草生未積春花落如霰  
出從張公子還過趙飛燕  
奉帚長信宮誰知獨不見

同前

王訓

日晚宜春暮風軟上林朝對酒近初節開樓蕩夜嬌石  
橋通小澗竹路上青霄持底誰見許長愁成細腰

同前

劉孝威

夫婿結纓簪偏蒙漢寵深中人引卧內副車遊上林綬  
染瑯琊草蟬鑄武威金分家移甲第留妾住河陰獨寢  
鴛鴦被自理鳳皇琴誰憐雙玉筋流面復流襟

送歸曲

梁吳均



送子獨南歸攬衣空閔默關山晝欲暗河水夜向塞燕  
至他人鄉鴈去還誰國寄子兩行書分明達濟北

秦王卷衣

樂府解題曰秦王卷衣言咸陽秦景  
及宮闕之美秦王卷衣以贈所歡也

梁吳均

咸陽春草芳秦帝卷衣裳玉檢茱萸匣金泥蘇合香初  
芳薰複帳餘輝耀玉牀當須晏朝罷持此贈龍陽

龍一作華

妾安所居

梁吳均

賤妾先有寵蛾眉進不遲一從西北麗無復城南期何

因暫豔逸豈為乏妍姿徒有黃昏望寧遇青樓時惟惜  
應門掩方餘永巷悲匡牀終不共何由橫自私

因一作用

大垂手

樂府解題曰大垂手小垂手皆言舞而垂其手也隋江總婦病行曰夫婿府中

趨誰能大垂手是也又獨搖手亦與此同此與小垂手二首藝文作簡文帝

梁吳均

垂手忽迢迢飛燕掌中嬌羅衫恣風引輕帶任情搖詎  
似長沙地促舞不回腰

小垂手

梁吳均

舞女出西秦躡影舞陽春且復小垂手廣袖拂紅塵折腰應兩箇頓足轉雙巾蛾眉與曼臉見此空愁人

夾樹

梁吳均

桂樹夾長陂復值清風吹氛氲揉芳葉連綿交密枝能迎春露點不逐秋風移願君長惠愛當使歲寒知

城上麻

梁吳均

麻生滿城頭麻葉落城溝麻莖左右披溝水東西流少年感恩命奉劒事西周但令直心盡何用返封侯

邊城將

四首

梁吳均

塞外何紛紛胡騎欲成群爾時始應募來投霍冠軍刀  
含四尺影劍抱七星文袖間血灑地車中旌拂雲輕軀  
如未殞終當厚報君

僕本邊城將馳射靈關下箭銜鴈門石氣振武安瓦勲  
輕賞廢丘名高拜橫野留書應鑿楹傳功須勒社徒傾  
七尺命酬恩終自寡

聞君報一殄遠送出平野玉標丹霞劍金絡豔光馬高

旗入漢飛長鞭歷地寫曙星海中出曉月山頭下歲晏  
坐論功自有思臣者

臨淄重蹴鞠曲城好擊刺不要身後名專騁眼前智君  
看班定遠立功不負義掣拽二丈旗躑躅雙鳬騎但問  
相知否死生無險易

春怨

梁吳均

四時如湍水飛奔兢迴復夜鳥響嚶嚶朝花照煜煜厭  
見花成子多看筍成竹萬里斷音書十載異栖宿積愁

落芳鬢長啼壞美目君去往榆關妾留住函谷唯對昔  
耶房如愧蜘蛛屋獨喚響相酬還持影自逐象牀易羶  
簾羅衣變單複幾過度風霜猶能保煢獨成一作爲

江潭怨

一作贈  
別新林

梁吳均

僕本幽并兒抱劍事邊陲風亂青絲絡霧染黃金羈天  
子既無賞公卿竟不知去去歸去來還傾鸚鵡杯氣為  
故交絕心為新知開但令寸心是何須銅雀臺

邊城思

梁何遜

柳黃未吐葉水綠半含苔春色邊城動客思故鄉來

南征曲

梁蕭子顯

櫂歌來揚女操舟驚越人圖蛟怯水伯照鷁竦江神

同前

題云南征

陳蘇子卿

一朝遊桂水萬里別長安故鄉夢中近邊愁酒上寬劍  
鋒但須利戎衣不畏單南中地氣暖少婦莫愁寒

春思

按李白集春思秋思並編入樂府  
蕭子雲已有此豈白亦擬梁人邪

梁蕭子雲

春風蕩羅帳餘花落鏡奩池荷正捲葉庭柳復垂簷竹

柏君自改團扇妾方嫌誰能憐故素終為泣新縑

簷一作簾

秋思

顏氏家訓曰蘭陵蕭慤工於篇什嘗有秋思詩云芙蓉露下落楊柳月中疎時人未

之賞也吾愛其蕭散宛然在目潁川荀仲舉卿瑯諸葛漢亦以為爾而盧思道之徒雅所

不恆

北齊蕭慤

清波收潦日華林鳴籟初芙蓉露下落楊柳月中疎燕

幃綳綺被趙帶流黃裾相思阻音息結夢感離居

息玉臺作

信



雜曲 二首

梁王筠

烏還夜已逼蟲飛曉尚賒桂月徒留影蘭燈空結花

烏一

作鳥

可憐洛城東芳樹搖春風丹霞映白日細雨帶輕虹

同前

江總徐陵同賦

陳傅綽

新人新寵住蘭堂翠帳金屏玳瑁牀叢星不似珠簾色  
度月還同粉壁光從來著名推趙子復有丹唇發皓齒  
一嬌一態本難逢如畫如花定相似樓臺宛轉曲皆通

弦管逶迤徹下風此殿笑語長相共傍省歡娛不復同  
訝許人情太厚薄分恩賦念能斟酌多作繡被為雙鴛  
長弄綺琴憎別鶴人今投寵要須堅會使歲寒恒度前  
共取辰星作心抱無轉無移千萬年

牀一作梁同作如  
長相作恒長雙鴛

一作  
鴛鴦

同前

徐陵

傾城得意已無儔洞房連閣未消愁宮中本造鴛鴦殿  
為誰新起鳳皇樓綠黛紅顏兩相發千嬌百念情無歇

舞衫迴袖勝春風歌扇當牕似秋月碧玉宮妓自翩妍  
絳樹新聲最可憐張星舊在天河上從來張姓本連天  
二八年時不憂度傍邊得寵誰應妬立春歷日自當新  
正月春幡底須故流蘇錦帳挂香囊織成羅幌隱燈光  
祇應私將琥珀枕暝暝來上珊瑚牀

最一作自  
應一作相

同前 三首

江總

行行春逕蘼蕪綠織素艸復解琴心乍愜南階悲綠草  
誰堪東陌怨黃金紅顏素月俱三五夫婿何在今追虜

關山隴月春雪冰誰見人啼花照戶

冰一作深  
追一作征

殿內一處起金房併勝餘人白玉堂珊瑚挂鏡臨網戶

芙蓉作帳照雕梁房櫳宛轉垂翠幕佳麗逶迤隱珠箔

風前花管颺難留舞處花鈿低不落陽臺通夢太非真

洛浦淩波復不新曲中唯聞張女調定有同姓可憐人

但願私情賜斜領不願傍人相比竝妾門逢春自可榮

君面未秋何意冷

併玉臺作便張女  
調一作張女曲

泰山言應可轉移新寵不信更參差合歡錦帶駕鴛鳥

同心綺袖連理枝皎皎新秋明月開  
白露飛螢暗裏來  
鯨燈落花殊未盡  
虬水銀箭莫相催  
非是神女期河漢  
別有仙姬入吹臺  
未眠解著同心結  
欲醉那堪連理杯  
後宮不慙茱萸芳  
夜夜爭開蘇合房  
寶釵翠鬢還相似  
朱唇玉面非一行  
新人未語言如溫  
新寵無前判不臧  
願奉更衣蘭麝氣  
恐君馬到自驚香

遺所思

樂府遺聲怨思二十五曲有遺所思按  
楚辭九歌云折芳馨兮遺所思疑本出

此

梁劉孝綽

遺簪彫玳瑁贈綺織鴛鴦未若華滋樹交枝蕩子房別  
前秋已落別後春更芳所思不可寄唯憐盈袖香

舞就行

梁劉孝儀

依歌移弱步傍竹艷新粧徐來翻應節亂去反成行

雀乳空井中

晉傅玄詩曰鵲巢丘城側雀乳空井中居不附龍鳳常畏蛇與蟲依

賢義不恐近暴自當窮  
雀乳空井中亦非樂府

梁劉孝威

遠去條支國心知漢德優聊棲丞相府過令黃霸羞挾  
子須間地空井共尋求輓轡絲綆絕桔槔冬蘇周將憐

羽翼長唯辭各背遊

優一作休  
長一作張

半渡溪

樂府解題曰半渡溪言戰而半涉溪水見迫所言皆嶺南地理與武溪深相類

梁元帝又有半路溪則言相達  
隔溪已識行步辭旨與此全殊

梁劉孝威

本廁偏伍伴一戰殄凶渠制賜文犀節驛報紫泥書入

營陳御蓋還家乘紫車皇恩空以重丹心恨不紓渡瀘

且不畏淩溪嗟有餘

空以重一作知已重

寒夜怨

樂府解題曰晉陸機獨寒吟云雪夜遠思君寒牕獨不寐但叙相思之意爾陶

弘景有寒夜怨梁簡文帝有獨處愁亦皆類此詞品曰陶弘景寒夜怨後世填辭梅花引

格韻似之後換頭微異

梁陶弘景

夜雲生夜鴻驚淒切嘹唳傷夜情空山霜滿高煙平鉛華沈照帳孤明寒月微寒風緊愁心絕愁淚盡情人不勝怨思來誰能忍

告遊篇

梁陶弘景

性靈昔既肇緣葉久相因即化非冥滅在理淡悲欣冠劍空衣影鑣轡乃仙身去此昭軒侶結彼瀛臺賓儻能



踵留轍為子道玄津

遙夜吟

梁宗夬

遙夜復遙夜遙夜憂未歇坐對風動帷卧見雲間月

荊州樂

三首荊州樂蓋出於清商曲江陵樂荊州即江陵也有紀南城在江陵縣東梁

簡文帝荊州歌云紀南城里望朝雲雉飛麥熟妾思君是也又有紀南歌亦出於此

梁宗夬

迢遞樓雉懸參差臺觀雜城闕自相望雲霞紛珮沓  
章華遊獵去紀郢從禽歸溶溶紫煙合鬱鬱紅塵飛

朝發江津路暮宿靈溪道平衢廣且直長楊鬱裊裊

迎客曲

詞品曰古者宴客有迎客送客曲亦猶祭祀有迎神送神也

梁徐勉

絲管列舞席陳含聲未奏待嘉賓羅絲管舒舞席斂袖  
嘿唇迎上客

送客曲

梁徐勉

袖續紛聲委咽餘曲未終高駕別爵無算景已流空紆  
長袖客不留

採荷調

樂府廣題曰梁太尉從事中郎江從簡年十七有才思為採荷調以刺何敬容

敬容覽之不覺嗟賞愛其巧麗敬容時為宰相一作採蓮諷

梁江從簡

欲持荷作柱荷弱不勝梁欲持荷作鏡荷暗本無光

發白馬

通典曰白馬春秋時衛國曹邑有黎陽津一曰白馬津鄭生云守白馬之津是

也發白馬言征戍而發兵於此也

梁費昶

家本樓煩俗召募羽林兒怖羌角觝戲習戰昆明池弓  
弦不復挽劒衣恒露鍔一辭豹尾內長別屬車垂白馬

今雖發黃河未結澌寄言閨中婦逢春心勿移

濟黃河

題云  
應教

梁謝微

積陰晦平陸淒風結暮序朝辭金谷戍夕逗黃河渚赤  
兔徒聯翩青鳬詎容與淚甚聲難發悲多袖未舉虛薄  
謬君恩方嗟別宛許

戍一作樹

同前

題云奉和濟黃河應教  
本梁人此疑與謝微同作

北齊蕭慤

大蕃連帝室驂駕奉皇猷未明驅羽騎凌晨方畫舟津  
城度維錦岸柳夾緹油鐘聲颺別島旗影照蒼流早光

生劒服朝風起節樓滔滔細波動  
齋齋輕舡浮迴撓避近磧放舳下  
前洲全疑上天漢不異謁蓬丘望  
知雲氣合聽識水聲秋從君何等  
樂喜從神仙遊

鐘一作鏡

同前

六朝聲偶  
作柳顧言

陳江總

蔥山淪外域鹽澤隱遐方兩源分際遠九道派流長未

殫所聞見無待驗詞章留連嗟太史惆悵踐黎陽導波

縈地節疏氣耿天潢憫周沈用寶嘉晉肇為梁

節一作脈

陵雲臺

魏志曰文帝黃初元年十二月初營洛陽宮戊午幸洛陽三年築陵雲臺劉義

慶世說曰陵雲臺樓觀精巧先秤衆木輕重然後構造無錙銖相負揭臺高峻恒隨風動搖揚龍驤洛陽記曰陵雲臺高二十三丈登之見孟津也梁謝舉

綺甍懸桂棟隱暖傍喬柯勢高凌玉井臨迴度金波易覺涼風至早飛秋鴈過高臺相思曲望遠騷人歌幸屬

此迢遞知承雲霧多

屬一作曠

同前

周王褒

高臺懸百尺中夕殊未窮北臨酸棗寺西眺明光宮城旁抵雙府林裏對相風書題鹿盧榜觀寫飛廉銅牕開

神女電梁映美人虹  
虞捐濫天寵鄭督特懷忠  
莊生垂翠釣昭儀  
抵鬪熊馳輪有盈缺  
人道亦汙隆  
還念西陵舞非復  
鄴城中

抵一作拒

### 伍子胥

梁鮑機

忠孝誠無報感義本投身  
日暮江波急誰憐漁丈人  
楚墓悲猶在吳門恨未申

猶一作空  
恨一作怨

### 建興苑

題云遊  
建興苑

梁紀少瑜

丹陵抱天邑紫淵更上林  
銀臺懸百仞玉樹起千尋  
水

流冠蓋影風揚歌吹音跼蹐憐拾翠顧步惜遺簪日落

庭光轉方幔屢移陰願言樂未極不道愛黃金

慢一作  
憶願一

終作

短簫

梁張嶠

促柱弦始繁短簫吹初亮舞袖拂長席鐘音由簾颺已  
落簷瓦間復繞梁塵上時屬清夏陰恩暉亦非望

田飲引

梁朱异

卜田宇兮京之陽面清洛兮背脩邛屬風林之蕭瑟值



寒野之蒼茫鵬紛紛而聚散鴻冥冥而遠翔酒沈兮俱  
發雲沸兮波揚豈味薄於東魯鄙蜜甜于南湘於是客  
有不速朋自遠方臨清池而滌器闢山牖而飛觴促膝  
兮道故久要兮不忘間談希夷之理或賦連翩之章

闕

### 車馬行

梁戴嵩

鞏洛風塵處冠蓋相填咽多稱魏其冷競隨田蚡熱輪  
趣白虎第珂聚黃金穴獻酒悉葡萄訓言盡飛鐵東都  
虵已鑄西山綬應結朝集類蒸煙晚至如吹雪子雲爾

何事門巷無車轍

薄暮動弦歌

梁沈君攸

柳谷向夕沈餘日蕙樓臨砌徙斜光金戶半入叢林影  
蘭徑時移落蘂香絲繩玉壺傳綺席秦箏趙瑟響高堂  
舞裙拂履喧珠珮歌響出扇繞塵梁雲邊雪飛弦柱促  
留賓但須羅袖長日暮歌鐘恒不倦處處行樂為時康

羽觴飛上苑

楚辭曰瑤漿密勺寶羽觴張衡西京賦曰促中堂之俠坐羽觴行而

無算羽觴謂杯上綴羽以連飲漢書音義曰羽觴作生爵形是也

梁沈君攸

上路薄晚風塵合禁苑初春氣色華  
石徑斷絲闌蔓草山流細沫擁浮花  
魚文熠燿含餘日鶴蓋低昂照落霞  
隔樹銀鞍喧寶馬分衢玉軸動香車  
車馬處處盡成陰班荆促席對芳林  
藤杯屢動情仍暢翠樽引滿趣彌深  
山陽倒載非難得宜城醇醞促須斟  
半醉驪歌應可奏

上客莫慮擲黃金

浮花一作浮槎

桂楫汎河中

梁沈君攸

黃河曲注通千里濁水分流引八川仙查逐源終未極  
蘇亭遺跡尚難遷眇眇雲根侵遠樹蒼蒼水氣雜遙天  
波影雜霞無定色湍文觸岸不成圓赤馬青龍交出浦  
飛雲蓋海遠凌煙蓮舟渡沙轉不礙桂檝距浪弱難前  
風急金烏翅自轉汀長錦纜影微懸榜人欲歌先扣柂  
津吏猶醉強持船河隄極望今如此行杯落葉詎虛傳

蘇亭一作漢帝薤  
一作合龍一作驪

晨風行

晨風本秦詩也晨風詩曰鴝彼晨風鬱  
彼北林傳曰鴝疾飛貌晨風鷦也言穆

公招賢人賢人往之疾如晨風之入北林也  
王循霧開九曲瀆沈氏理機令舟人但歌晨

朝之  
風爾

梁王循

霧開九曲瀆風起千金堤岸回分野逕林際成牛蹊  
隨落潮去日傍綺霞低望目輕舟隱瑟瑟遠寒悽還眺

小平急宴語方難齊

目一作日

同前

沈滿願

理機令舟人停艫息旅泊河津念君劬勞冒風塵臨路  
揮袂淚沾巾飈流勁潤逝若飛山高帆急絕音徽留子

句句獨言歸中心  
恍恍將依誰風彌  
葉落永離索神往  
形返情錯漠循帶  
易緩愁難却心之  
憂矣頗銷鑠

一旦歌

樂府無名次  
玉臺卿詩後

一旦被頭痛避頭  
還著牀自無親伴  
侶誰當給水漿匍  
匐入山院正逢虎  
與狼對虎低頭啼  
垂淚淚千行

映水曲

梁沈滿願

輕鬢學浮雲雙蛾  
擬初月水澄正落  
釵萍開理垂髮

登樓曲

梁沈滿願

憑高川陸近望遠阡陌多相思隔重嶺相憶限長河

限一

恨作

### 越城曲

樂府作無名氏  
與登樓曲相次

別怨悽歌響離啼濕舞衣願假烏棲曲翻從南向飛

### 聽鐘鳴

梁書曰綜武帝第二子封豫章王綜母  
齊東昏美人武帝滅齊納之七月而生

綜綜自以本東昏子及為都督南兗州刺史  
聞齊建安王蕭寶寅在魏乃與數騎奔魏以  
為侍中太尉綜既不得志嘗作聽鐘鳴悲落  
葉辭以申其志大畧曰云云當時見者莫不  
悲之南史事同而無其辭洛陽伽藍記曰洛  
陽城東建陽里有臺高三丈上作二精舍有

鐘撞之聞五十里太后移在宮內凝閑室初  
豫章王蕭綜聞此鐘聲遂造聽鐘歌三首行  
于世按梁書二辭各三首似與記合但存其  
畧耳藝文詩彙所載與書頗異今附于後

梁蕭綜

聽鐘鳴當知在帝城參差定難數歷亂百愁生去聲懸  
窈窕來響急徘徊誰憐傳漏子辛苦建章臺

聽鐘鳴聽聽非一所懷瑾握瑜空擲去攀松折桂誰相  
許昔朋舊愛各東西譬如落葉不更齊漂漂孤雁何所  
栖依依別鶴夜半啼



聽鐘鳴聽此何窮極二十有餘年淹留在京城窺明鏡  
罷容色雲悲海思徒揜抑

悲落葉

梁蕭綜

悲落葉連翩下重疊落且飛從橫去不歸

悲落葉落葉悲人生譬如零落不可持

悲落葉落葉何時還凡昔共根本無復一相關

聽鐘鳴

此或聽鐘鳴  
全篇之一

歷歷聽鐘鳴當知在帝城西樹隱落月東牕見曉星霧

露朏朏未分明烏啼啞啞已流聲驚客思動客情客思  
鬱縱橫翩翩孤鴈何所栖依依別鶴半夜啼今歲行已  
暮雨雪向淒淒飛蓬旦夕起楊柳尚翻低氣鬱結涕滂  
沱愁思無所託強作聽鐘歌

悲落葉


此至高下任飄颻或是悲落葉全篇之一後云悲落葉落葉何時還或別一篇

悲落葉聯翩下重疊重疊落且飛從橫去不歸長枝交  
蔭昔何密黃鳥關關動相失夕葉雜凝露朝花翻亂日  
亂春日起春風春風春日此時同一霜兩霜猶可當五

晨六旦已颯黃乍逐驚風舉高下任飄颻悲落葉落葉  
何時還夙昔共根本無復一相關各隨灰土去高枝難

重攀

綜終于魏詩紀編入北魏  
然其本傳在梁今附梁後



古樂苑卷三十八